

الفاجومي

أنا أحقق من الحماقرة

■ أمي كانت تقول لي الرجل ما يبلعش لسانه
 ■ كنا في الكتاب طبقات.. فرقة القمح وفرقة الدرر
 ■ وبتوع الشعير اللي كنت بتشرف عمل لواءها
 ■ استطعت أن أفرض احترامي على كلاب العزيزه عدا
 كلب واحد.. اسمه كلب كانوا
 ■ سيدنا قال إن كلب أهل الكهف اسمه قطمير وهو سيد
 كلاب الأرض

obekikan.com

من بين المواهب العديده اللي حبانى بيها سبحانه وتعالى مشكوراً موهبة الحماقه
ولا فخر.. ويمكن المرحومه أمى ساهمت فى تطوير وتنمية الموهبه دى عندى من باب
الإعجاب.

مثلاً!

أنا فاكرو إحنا عيال لما كان عيل من إخوانى تصدر منه هفوه.. كان يتحاسب
حساب الملكين.. والإش بقى لو فاته فرض ربنا.. ياداهيه دقى.

- قوم ياكافر يابن الكافر يا تارك الصلا يا قليل الدين ماتكلش معانا. وتحط له
ياكل لوحده زي الكلب.. والكل يبقي شمتان فيه.. وأولهم انا طبعاً.

وأنا يا مبارك لا صلا ولا صوم ولا حيا.. ودابر زى العقربه ألوش فى خلق الله
شمال ويمين.. وأشخط وأسب الدين.. وهى فى الطناش المسوجر.. وأحياناً ما
تقدرش تدارى إعجابها فتضحك بفخر! ولو عيل من إخوانى سأل.. حتى من باب
العلم بالشىء:

- إشمعنى ده؟

تقول له:

- دا عيان ومجنون وعنده داء الدفعه.

ودا صحيح مع الأسف.

أنا ركبك بس الهوا يصفر فى ودانى.. آخذ فى وشى زى الجمل لاطرش..
ومطرح ما ترسى أدق لها.. عمرى ما شلت فى قلبى لحد.

- تكفى العايب عيبته.

هى اللي كانت تقول كده.. وكانت تقول لى: الراجل ما ييلعش لسانه.. واللى
إيدك مش فى مقطفه عفريت يلهفه.. واللى إيدك مش فى قفصه ضربه تقطع نفسه..

واللى عينه مش مكسوره يقدر يقول عينك حمرا يا غوله.. إلى آخر تراث الحمقى
اللى أعتقد أن السيد المسيح عليه السلام سماهم ملح الأرض.. عمرى ما حسبت
حساب بكره.. الله جاب الله خد الله عليه العوض.. الله يرحمك يا حاج عبده يا
دمرداش.

شبيتنى يا زمن
وأنا ما استحق الشيب
وخذت منى الحبايب
ولا اختشيت العيب
حوشوا الغنم
عن عليق الجمل
أحسن دا يبقى عيب
لو كان جمل فى جمل
ماكانش بقى عيب
وأجود ما فى الفتى
جيبه
وإن لطش الزهر
الفقر ماهوش عيب

والحاج عبده ده كان فنان شعبى مالوش حل.. كان جاهل بالقرايه والكتابه زى
المرحومه أمى.. لكن مواويله اللى كان بيرتلها أو بيألفها على مهله أو حتى اللى كان
بيختارها ويغنيها تشهد له بأصالة الموهبه وسلامه الذوق..مثلاً:

يا جنه الملتقى

میں فات سأل عنّا
ومین عطف بعدنا
ع الورد یا جنه
دالی نساکی اتنسی
واللی جنی اتھنی
وأنا اللی طبعی الوفا
ما أقدرش أنساکی
یاریت تعود اللیالی
ونسی ما جرى منّا

كان قهوجی كل علاقته بالمزیکه إنه سمع شاعر الربابه وبعدين مكنة الفنار وبعدين الراديو ومع ذلك كانوا الملحنين الأفذاذ علی زمانه أمثال الشيخ درویش الحریری والشيخ زکریا أحمد والشيخ إسماعیل سکر والصیته العظام أمثال الشيخ علی محمود والشيخ محمد رفعت والست فتحیه أحمد والشيخ أحمد ندا وغيرهم دول كانوا زباين قهوته لیلاتی ولما كان یبقی سهران فی فرح یروحوا له بربطة المعلم ویسهرُوا صباحی مع الهنک والرنگ والعُربُ والعفقات الحراقه وكل فنون الطرب والأداء المعجز الساحر من فنان أصیل متمکن ما جاتش سیرته «لحسن الحظ» علی سن قلم هلفوت من هلافیت الصحافه والأدب والإذاعه والتلیفزیون.. الشيخ إمام مره قال لی عنه:

- الحاج عبده ده یابو النجوم مشکل.

فقلت له:

- لیه یا إمام؟

قال لى:

- فطاحل شعراء البلد يبعده واحد منهم وعتاولة الطرب والمزيكه فى البلد
يبعده واحد منهم وهو سبحان الله ماكانش عارف قيمة نفسه.

قلت له:

- وإنت إيه رأيك فيه؟

قال لى:

- ما أنا باقول أهه.. هو أنا باتكلم رومى؟!

ونوادر الحاج عبده الدمرداش ماتقلش حلاوه عن فنه.. مثلاً..

هو كان زى حالانى ضعيف جداً أمام سحر بنات أمانا حوا رضى الله عنها
وأرضاهما ويبدو أنه كان مستقلب المزاج يعنى متعدد العلاقات.. برضه زي حالاتي..
وفي ليله من ذات الليالي كان سهران في فرح.. وكان الشادر اللي حبيغنى فيه
منصوب تحت شباك الدنياره اللي كان هو لسه دالقهها من أسبوعين.. صاحبتنا خدت
خبر الخففت واتزوقت على سنجة عشره ولبست قميص مقور ماركة «عش النمل»
اللى هو عدم المؤاخذه لا يبين ولا يخبى وقعدت ع الشباك، ونزكت ابنها الصغير
يلعب قدام الشادر عشان تشغله سلك تليفون توصل من خلاله الرساله للحاج
عبده.. وهو دا بقى فن التلقيح اللي أبدعته وأبدعت فيه بنت البلد المصرية اللي
حيرت عمنا بيرم العظيم ونزلته من بروج الأدب وفرجت عليه اللي يسوى واللى ما
يسواش.

لسه الحاج عبده حيقول يا هادى.. زعقت صاحبتنا على ابنها والكلام ليكى يا

جاره:

- ما تطلع بقى ياواد وكفايه سنكحه.. هو إنت لسه فيك نفس يامدهول؟.. اطلع

دا إنت سلمت النمر.. وانهد حيلك.. ونفسك انقطع خلاص.

الحاج عبده طنش واستمر في المغنى والسميعة تقول أه.. إن صاحبتنا تسكت؟
أبدًا.. وفوجئ الناس بالحاج عبده يبصع الشباك ويرتجل الموالم التالى:

يا نمل نام لى

وسلم لى على نملى

واكثر سلامى

ع اللى لابس

قميص حرير نملى

طلبت منه الوصال

قام بالعجل

نام لى

يا قلبى فُضِّكْ

من اللى بالعجل بينام

هلبت ما نام لغيرى

قبل ما نام لى

ويقال والله أعلم إن المرا خشت والشباك اتقفل إلى يومنا هذا.



يرجع مرجوعنا وموضوعنا للحماقه اللى ملازمانى ومسببه لى المشاكل ووجع
القلب أنا كنت فى حدود أربعتاشر سنه يعنى زى ما يقولوا الشعرا.. فى مطلع الصبا
- وفجأه وقعت قتيل المحبه متيم فى هوى السنيوره المدهشه إكرام بنت عمى سليم
شيخ البلد وابن عم أبويا.. وربنا يجازى اللى كان السبب. ولاد الكلب اسثلمونى
ونزلوا زن على ودانى.. وَدِ وَدِ وَدِ وَدِ وَدِ.. أمها تقول وأمى ترد عليها:

- إكرام وفؤاد موهوبين لبعض.

- يا مرحبا ياختى هى حنلاقي عريس أحسن منه؟

- ولا إحنا ياختى حنلاقي عروسه أحسن منها.. ربنا ياختى يكملها بعقلها.

- وشوفى تضاريف ربنا.. لتنين يتولدوا سوا فى يوم واحد.

- النصيب غلاب ياختى.. النصيب.

إدينى عقلك بقى.. قالوا يا جحا حتعيا بالسخونه.. قال لهم: فاضى ورايق لها..

وكان بينافسنى فى هوى إكرام سعيد ابن عمى عثمان.. اللى هو برضه شيخ بلد وابن عم أبويا يعنى كلنا على بعض كده كان زيتنا فى دقيقنا.

وطبعاً كان كل واحد فينا عنده أسبابه فى هوى المحبويه وله أسلحته فى المنافسه..

أسبابى أنا كانت كثيره من أهمها مثلاً الجلايب اللى كانت بتلبسها مش السواد

الأصلى الجربان اللى لابساه بقيه بنات العزبه.. وكان شعرها سايح وأسود ومغطى

نصها الفوقانى وأكيد كان خالى الحشرات المستوطنه بكثافه فى شعور بنات

الفلاحين.. وكانت تلميذه فى مدرسة أبو حماد الابتدائيه وكانت بشرطن

بالإنجليزى.. وبتلعب طاولة وبتغلب أجعصها راجل.. وكانت بتتكلم وتضحك

بصوت غناج.. حاجه كده زى المنجايه اللى من غير بذر يعنى بالصلاع النبى كده

كانت نتايه تهيج الحجر.. وأنا مش حجر.. دى بعض الأسباب.. أما أسباب أخونا

سعيد فمكانش يعلمها غير اتنين.. هو وعلام الغيوب.. نيجى بقى لأسلحته نلاقيها

كثير.. أبوه عايش وشيخ بلد وعليه طين.. كانت أملاك أبوه تتعب فيها العين ما

تحيش آخرها.. علاوه على كده كان تلميذ فى أبو حماد الابتدائيه ومستقبله مضمون

زى الجنيه الذهب، أما العبد الفقير فكان سلاحى الوحيد إن إكرام بتحبني.. كانت

دايمًا تقول لى:

- إنت عفريت.. وانا بحب العفاريت.

غير كده.. الفاتحه للنبي أنا كان باطى والنجم لا أب ولا طين ولا مدرسه ولا

مستقبل ولا يحزنون.. مع إننا ولاد عم.. ماتعرفش قسموها إزاي.. ومين اللي قسمها كده؟ ولما رحلت أسأل الشيخ أبو عطيه باعتباره إمام المسجد وشيخ الكتاب ومندوب ربنا في أرضه قعد يبص لى بدشه من فوق لتحت ومن تحت لفوق والآخر تف ع الأرض في اتجاهي وقال لي:

- إنت فيك بذره شيطانيه والعياذ بالله.

وزى عوايده حب يدعم فتواه بالشعر فراح واخذ وضع الاستعداد وتف ونخم واتنحج ثم أنشد يقول - صلوا على طه الرسول:

ملك الملوك إذا وهب

لا تسألن عن السبب

الله يعطى من يشأ

فقف على حد الأدب

يا كافر يابن الكافر

قلت له بمتهى البراءه:

- استغفر الله العظيم ياسيدنا أنا مسلم وموحد بالله.. إنت بس اللي مش واخذ بالك أمى يتقول إن عمامى ولاد الكلب أكالين السحت هما اللي كلونا ونهبونا على حياه عين أبويا وبعد أبويا ما مات طالعين على أمى زى الديايه عايزين ياكلوا لحمها حي.

قال لي:

- أمك دى مره مهر وشه والحشيش لحس مخها.

قلت له برضه بمتهى البراءه:

- يظهر إن كلامك صحيح يا سيدنا.

ابتسم لأول مره وقال لي:

- ليه يا ولّه؟

قلت له:

- دنا باقول لها ماتزعليش يامه وانا ح أخلّي سيدنا يفضحهم ع المنبر فى صلاه
الجمعه قعدت الأول تضحك وبعدين فقعت بالصوت فى وشى وقالت لى:

- جاك شهر حزن وشهرين نيله عليك وعلى سيدنا بتاعك وقالت عليك يا سيدنا
إنك راجل بكرش وبتاكل على طبلية وإنك بتفتى ع النمله و تبلع الجمل... وإنك
مش حتعرض على جنه ولا حتندفن فى طرب مسلمين لأنك راجل ابن كلب
ضلالى وشبيه عرعر وذمتك يرمح فيها الخيال.

ولسه ح اكمل راح صارخ فى وشى:

- بس كفايه يابن الزوانى.. إنت مين مسلطك على النهارده؟

ودخل الميضة جاب شومه وفضل يجرى ورايا فى الغيطان لما انقطع نفسه ولما
يأس من إنه يلحقنى قعد على قرافيصه فى حوض الباميه وقال وهو بينهج:
- حسى الله ونعم الوكيل فيكو يا عيله نجم م الباب للمحراب.. اسفخص عليكو
عليه نجسه.



نرجع للحب الأول وحماقاته.

كانت عصره جميله من عصارى الربيع اللى كان بيلبس أحلى وأغلى الملابس لما
ينزل كل سنه فى ميعاده على عزبة أبو نجم الغرقانه فى الخضره والميه طول السنه...
كنا قاعدين فى ملفف نسيم العصارى على كوبرى ترعة الملاك تلاته وربنا رابعنا
حبيبه القلب إكرام والعدول سعيد ابن عمى وأعوذ بالله من قوله أنا... مش فاكر كنا
بتكلم ولا ساكتين وفجأه قالت المحبوه بمتهى الدلال:

- غنى يا فؤاد... أنا با حب صوتك.

يا نهاري زى بعضه... طب حظ نفسك مطرحى... تعمل إيه؟

أنا فى هذه الأثناء كنت يومياً أسمع أغاني فيلم يحيى الحب من راديو عمى سليم أبو بطاريه سايله.. كان فيه تلاته فى البلد.. واحد فى سرايه العمده وواحد فى دكان أبو عبد الله بقال التموين.. والتالت اللي هو فى دار أبويا سليم.. الراديو ده كان فيه شبه كبير من دولاب الشعريه اللي بينزل البلد كل رمضان.. وكانت البطاريه بتاعته أكبر من بطاريه العربيه ومليانه ميه نار وكانت لما بتفضى نروح غملاها من مكنة الطحين؟ بالعباسه ويعلم الله إنى لغايه وقتنا هذا مش قادر أفهم إيه علاقة مكنة الطحين ببطارية الراديو ومية النار؟

وكان فيلم يحيى الحب بطولة مطرب الملوك والأمراء الأستاذ محمد عبد الوهاب اللي كانت الجماهير بترشحه لرتبه البكويه أسوه بجورج بك أبيض وسليمان بك نجيب.. لكن الملك ماكانش راضى ينعم عليه بالرتبه.. لأنه «حسب كلام عبد العزيز أخويا» كان بينافسه فى النسوان.

وكانت البطولة للآنسه ليلي مراد اللي اعتبرها عبد العزيز أخويا أكبر اكتشاف فنى وأجمل صوت نسائي بعد الآنسه أم كلثوم واللى بعد كده قدرت تدخل للقلوب بصوتها الدافى الساحر وأغانيها اللي أصبحت لسان حال العشاق من الجنسين حتى فى العزب والنجوع لأنى بعد كده كنت باسمع أغانيها بصوت أمى الجميل!

ولما كان عبد العزيز أخويا يببعتنى بجوابات الغرام لفوزيه بنت عمى كنت بافتحها فى السكه واقراها.. فكنت دائماً ألقى كلام من أغاني الآنسه ليلي مراد بين السطور.

القصد.. نرجع لكوبرى الملاك.

هى قالت لى:

- غنى يا فؤاد أنا باحب صوتك..

وأنا طلعت زى البندقيها خرطوش:

يادى النعيم اللي إنت فيه يا قلبى

من بعد العذاب

كان لك حبيب تشتاق إليه

وارتد لك بعد الغياب

أنا أغنى وهي تقول:

- الله.. تانى والنبي يا حماده عشان خاطرى..

أعيد تانى.. لحد ما وصلنا للجو راق وارتاح البال.. العزول ماطاقش روحه..
راح قايم رامى نفسه فى الترعه بهدومه.. وبدأ يغطس ويقب ويقلل.. وأنا فرحان
وحاسس بالزهو.. وفوجئت بإكرام بتصرخ:

- إلحق يا فؤاد.. سعيد بيغرق.

أنا بقى يا سيدى اللى ما انت فى هذه الفتره كان حصل لى شرف دخول سيما
أبولون فى الزقازيق حوالى سبع تمن مرات.. ويشاء السميع العليم إنى كل ما أدخل
السيما ألاقى طرزان.. كان جدع طول بعرض ولابس مايوه جلد نمر وساحب وراه
قرد اسمه شيتا وطايح فى الغابه.. يزعق الزعقه «عا عا عا» يزلزل حيطان السيما
ويسيب مفاصل الجمهور.

وأجدع حاجه كانت بتعجبني فى عمنا طرزان.. كان يقف ع الشجره ويزعق «عا
عا عا» ويروح ناطط.. سمكه.. فى الميه ويغيب تحت الميه وبعدين يقب تمساح
ويفضل يعوم والقرد وراه.. والتماسيح تشوفه تخلع.. وكل تمساح يستخبي فى زؤر
والعيال تسقف وتصفر فى الترسو تضامناً مع الشجيع ضد التماسيح.

بس يا سيد.. هى قالت لى:

- إلحق يا فؤاد.. سعيد بيغرق.

وأنا فى لمح البصر كنت مالخ الجلاييه السحو وعامل إديا على بقى قرطاس وعا
عا عا ورحت قازح من فوق درابزين الكوبرى.. أولاً آخذ بنط على غريمى أمام

المحبويه.. وثانياً أنقذ غريمى من الغرق فى مبادره رومانسيه تسجل اسمى بحروف من النور فى كتاب العشاق الفرسان.

وإذ بى يا مبارك وانا بين درابزين الكوبرى وصفحه النهر أتذكر إنى ما باعرفش أعوم.. وصرخت من معاميعى:
آه.. يا لهوى يامه.

وانقطعت أخبارى تحت الماء على رأى عبد الحليم.. لحد ما فقت على المنقذ الشهم اللى هو الغفير النظامى إبراهيم الطيب معلقنى من رجلىا زى الديقحه وبينطقنى بغباوه.. الاسم بيصفينى من الميه.. لكن الحقيقه هو كان بيصفى حسابيه معايا لأنى من يومين بس.. كنت ماسك محمد ابنه ومطفحه الدم واحنا بنلعب الحكشه والدليل على سوء نيه المنقذ إنه طلع سعيد ابن عمى الأول وصفاه بحنيه وانداز على علقنى وهاتك ياتنطيق وكل تنطيق بخزرانه على ضهرى.. وابن الحرام لما حس إن أمى جايه من بعيد تصوت وتولول زاد فى الضرب وهو يقول:

- هيه أمك الغلبانه ناقصه حزن - طاخ - تحرم ياد تنزل الميه - طيخ - أشوفك فى الترعه تانى ح اهرى بدنك - طوخ.

وبنت الكلب حبيبه القلب ميته من الضحك.. وهو دا اللى وجعنى أشد من لسع الخرزان على رأى عتر بن شداد رحمه الله عليه.

حماقه تانيه كان ممكن بسببها أروح فى الكازوزه وابقى مفيش.. لكن بقى على رأى أمى.. عمر الشقى بقى.. ولا يقعد ع المداود إلا شر البقر.. تقصدنى طبعاً.

الشيخ أبو عيطه شيخ الكتاب الآنف ذكره.. كان راجل جهول وغليظ وربنا ماحطش فى قلبه أى نوع من أنواع الرحمه.. طول ما احنا قاعدين فى الكتاب نازل فينا ضرب عمال على بطال وكأنا قتلنا لأمه قتيل.. وولاد الكلب أهالينا هما اللى شجعوه ع الخصله السودا دى.. يعنى مثلاً تلاقى راجل قد الفلق جاى وساحب عيل عنيه معصين وبربوره مدلدل ووشه أصفر ومكرش م البلهارسيا وضلوعه تنفذ من تحت الجلاييه الوسخه اللى لابسها وحافى وحالق إنجليزى ويقول له الواد ابنى ااه

ياسيدنا عايز يختم المصحف فى سنتين.. وعنى أنا أبوه باقول لك.. إكسر وأنا أداوى
«شوف الحيايه».

ولو عيل مننا استجرا واشتكى لأهله يقولوا له:

- يا بختك ياهناك.. دى عصايه الفقى من الجنه.

ومن علمنى حرفاً صرت له عبداً وإلى آخر الكلام اللي مش جايب همه ده.

وكانت أجره سيدنا بتندفع له ع المحصول.. الغنى يديه ع الراس كيله قمح
والمستور كيله دره والفقير الكحيتى كيله شعير.

وكان ابن الزنا مقسم قعدتنا فى الكتاب.. تقسيم فتوى.. بتوع القمح دول أهل
اليمين يقعدوا ع اليمين وبتوع الدره دول بتوع وجعلناكم أمهً وسطا.. دول يقعدوا
فى النص وبتوع الشعير دول أهل الشمال والعياذ بالله يقعدوا ع الشمال وكانت
فرقه القمح هى - جلاب الطيب - بالنسبه لسيدنا.. كل يوم الصبح يجيبوا له مالذ
وطاب من البيض والزبد والجبنه والفطير المشلتت والقشطه وعسل النحل..
وخلافه.. هو كمان كان عامل بالمثل الساير.. إطعم الفم تستحى العين.. كان
بيحترمهم بشكل دنيء.. كان يقول للعيل فيهم واحنا مروحين:

- مع ألف سلامه ياسى فلان.. بلغ احترامى للسيد الوالد والست الوالده..
وماتنساش تقول للحاجه.. تحضر لنا فضله خيرها بكره.. أنا جاى اقرا الراتب إن
شاء تعالى.. مع ألف مليون سلامه.

وفرقة الدره كانوا ينضربوا أحياناً بس إيه؟.. ضرب الغزبه فى حمارها.. ودا كان
بيحصل فى حاله الغلط الشديد أو الإصرار على عدم الحفظ.

أما فرقة الشعير اللي كنت باتشرف بحمل لواءها الخفاق فدى كانت الهدف
الدائم والسهل والمباشر لشومه سيدنا ولسانه اللي زى المبرد.

كان عنده كنز لايفنى من أسماء التليل اللي كان بيخصنا بيها:

- ياولاد الكلب يا جاموس أبيض.. يابقر وياولاد البقر.. ياخنازير ياولاد الخنازير.. يابهيم ربنا ياولاد البهائم.. ياحثالة الحثاله يارمم.. يازواني ياولاد الزواني.. وكان دا كله يهون جنب شطحات الجنون اللي كانت بتلبس جتته فجأه فيقلب لنا الكتاب دندره وسبحان المنجي.

يعنى مثلاً كنا نبقي قاعدين في أمان الله وبنحفظ في كلام ربنا العزيز ونفاجأ بالشومه نازله على دماغ أو وش أو دراع أقرب عيل من فرقه الشعير مكمواه مطرحة!

وبعدين نكتشف إن ده مجرد هزار وسيدنا بيضحك ويقول للضحيه:

- أمك قالت لأبوك إيه ليله الجمعة ياواد.. آه يابن المرا اللي مابتقولش لأ.

ويروح راقعه شومه تانيه وهو متكوم - على سبيل المداعبه - ويروح ضاحك وباصص لنا - وتضحك فرقه القمح وفرقه الدره وبعض فرقه الشعير فينشكح سيدنا ويتهياؤه إنه كده يبقى دم أمه خفيف!

وياويل العيل اللي يظبطه سيدنا متلبس بعدم الضحك.

وكان معنا في الشعير عيل اسمه محمود عرفه.. الواد كان ماسكه مرض أبو النوم.. كان بيتام وهو قاعد ويناام وهو واقف ويناام وهو ماشي.. ودا كان بيشيل تلتين هزار سيدنا لوحده.. وبرضه يرجع ينام.. وفي ذات مره جت لسيدنا الطوفه أثناء ما عرفه كان نايم.. فوجتتا بسيدنا فازز متتور على حيله وقال بدون مناسبه وبصوت منغم:

كلا الأخوين مظراط ولكن شهاب الدين أظرط من أخيه

وأثناء ما كان سيدنا بيتمايل وهو بينشد لمح عرفه نايم فاتجه ناحيته وزغده بالشومه في رأس قلبه:

- فاهم ياعرفه؟

وقام عرفه مفزوع وقال له:

- نعم يا سيدنا؟

قال له:

- شهاب الدين؟

قال له:

- ماله ياسيدنا؟

وكز سيدنا على أسنانه وقال له:

- أظطر من مين يا عرفه؟

قال له:

- مش واخذ بالي يا سيدنا.

ونزلت الشومه على ظهر المسكين زى المرزبه وسيدنا يقول له:

- من أخيه يابن الكلب يا بقره.

وقفز عرفه فى الهوا من ألم الضربه وهو يصرخ:

- من أخيه يابن الكلب يا بقره.

وضج الكتاب بالضحك القمح والدره والشعير ماعدا سيدنا اللى اعتبر إن عرفه

بيقصده بجمله يابن الكلب يا بقره وفضل يضرب فيه لحد مانام.

شوفوا خفة الظل!

نيجى بقى لموضوعى.

كان يوم مايتنسيش.. يوم أغبر ما طلعتلوش شمس.

قاعدين فى الكتاب منهمكين فى الحفظ وإذ بالطوفه تيجى لسيدنا فيروح متور

على قزحه ويسألنا بدون أى مناسبة:

- فيه خمس أشياء حينخشوا الجنه عارفينهم ياولاد الكلب يا بقر؟
- لا يا سيدنا.

فابتسم ابتسامه النصر.. وبدأ يتكلم بلهجه العالمين ببواطن الأمور وقال:

- غراب سيدنا قايل.. وناقه سيدنا صالح.. وحتوت سيدنا يونس وعصايه سيدنا موسى.. وكلب أهل الكهف.

أنا اللي علق في دماغى كلب أهل الكهف من وسط الهلمه دى.. ليه بقى؟

أنا فى هذه الأثناء كان بينى وبين كلاب البلد حرب ضروس ومشاكل مالهاش أى حل.. حرب أنا مابدأتهاش.. ويعلم الله أنى كنت متلهف على وضع حد ونهايه لها.. لكن الأمور كانت كل يوم تسير من سئ إلى أسوأ بحيث انضربت كل فرص السلام بينى وبين كلاب البلد.

يعنى مثلاً لو سيادتك ماشى فى أى وقت من أوقات الليل والنهار فى عزبة أبو نجم وسمعت كلب يبعوى أو يصرخ مستجيراً.. حتلاقينى هناك.. غفل له شويه أو سهى عليه وهو ماشى أو ركن جنب حيطه وحط دماغه بين رجلية وخدله تعسيله أروح منقض عليه أسرع من لمح البصر لايشه حجر أو عصايه أو شلوت يصرخ ويحط ديله بين وراكه ورجليه ماتعلمش ع الأرض - بس وهو بيجرى يتلفت يلمحنى - وكرد فعل طبيعى وعادل كنت دائماً وأنا ماشى بالليل فى الضلمه أفاجأ بجسم غريب بينظ فى كرشى ع الساكت يعترنى طبعاً.. وقبل ما ألم نفسى يكون اختفى من غير ما أتأكد من شخصيته.

ولو سعادتك مثلاً فى الليالى اللي مافيهاش قمر سمعت مجموعة كلاب بتنبح بضاواه وبلهجة انتقام يبقى دا معناه إن أخوك محاصر فى حته مافيهاش طوب وموقفه حساس.. إلى أن يأتى الله بالفرج فى هيئه شخص معاه عصايه يهشهم عنى بس بعد ما تكون صواميل ركبى سابت من بعضها ومنظرى بقى لا يسر عدو ولا

حبيب وعشان كده كنت بالنهار باخد العاقل بالباطل .. ويكده قدرت أفرض
احترامى على كلاب العزبه كلب كلب اللهم إلا كلب واحد.. اسمه كلب كارنو.

وكارنو دا كان واحد من مئآت الأوروبيين اللى كانوا مستوطنين الريف المصرى
قبل وأثناء وبعد الحرب العالميه الثانيه بعضهم كان فاتح خمارات وبعضهم كان فاتح
محلات بقاله وبعضهم كان عامل مكن طحين أو مكن رى وكان أقربهم لقلوب
الفلاحين المصريين اليونانيين بالذات.. وكان كل الخواجات دول ساكنين فى سرايات
على النظام الأوروبى.. صحيح مبنيه بإدين الفلاحين المصريين.. لكن الهندسه كانت
أوروبيه.

كانت كل السرايات نظام واحد.. اللون الأبيض.. والجنيهه اللى محاوطه السرايه
وفيه من خيرات الله ما لذ وطاب.

أنا شفت سرايه الخواجه كارنو صاحب الكلب المذكور وشفت سرايه الخواجه
مرشاق اليهودى الشامى اللى كان ابنه فريد بيه صديق شخصى للملك فاروق وكان
يلعب معاه قمار ونسوان وخلافه.

وسرايه الخواجه باسطوليا اليهودى الفايظجى اللى سلف أبويا إبراهيم «عمى
شقيقى» تمتناشر جنيه بالفايظ وفضل المسكين يسدد فيه تسع سنين ومات ولسه عليه
من أصل المبلغ اتنين وتلاتين جنيه!

وشفت سرايه الخواجه أنطون أو ألتون زى ما كنا بننطقها.

الخواجه مرشاق كان عامل جنينه حيوانات صغيره خارج جنينه السرايه.. وكانوا
أهالينا كل شم نسيم يلبسوننا هدوم العيد اللى فات ويبعوتونا نعيد ع الخواجه والمدامه
بتاعته.

كنا نقوم الصبح بدرى نلاقى البصل الأخضر تحت روسنا نشمه الصبح ونلبس
ونتجمع قدام سرايه العمده ونتكل على الله على عزبة مرشاق على بعد حوالى أربعة

كيلو.. نخبط على باب الجنيته الخشبي يطلع لنا الخدام سيد أبو معيز يفضل
يشخط فينا شويه بحجة إنه بينظمنا وبعدين يقول:

- إنتوت جاين بدرى كده ليه؟.. الخواجه لسه نايم.. ومش عايز أسمع صوت..
وبعد مانسكت قيمه ربع ساعه يفتح لنا باب الجنيته ويقول:

- ماحدث يتحرك من مطرحة.

ويدخل يغيب شويه وبعدين تطلع الخواجايه وهو وراها فتقول لنا:

- كل سنهواتو طيبين يا بنات.. كل سنه واتو طيبين يا اولاد.

ونرد في نفس واحد:

- وانتي بالصحه والسلامه ياستى الحاجه.

ويبدأ سيد أبو معيز يوزع علينا الخس والملايه والبيض الملون بعد ما يكون نشف
ريقنا وسم بدننا وبعدين يطلع الخواجه مرشاق في البرانده تروح مسقفين وقايلين:

- هيبه.. فالتعيش الخواجه.

يرجع سيد أبو معيز تاني يوقفنا طابور عشان الخواجه يسبقنا واحنا نمشى وراه
على جنيته الحيوانات نتفرج ع التعالب والقروود والنسانيس والحمار أبو فائله مخططه
كل دا والخواجه بيشرح لنا بكلام ماحناش فاهمين منه حاجه واحنا نسقف وسيد أبو
معيز يشتمنا والآخر تروح على بيت الغزلان.. وكان التيس بتاعهم قرونه زى
الشجره وكان الخواجه مرشاق مسميه شيخ العرب.. يروح الخواجه ماسكه من قرونه
ويسحبه منها لغايه مايجيبه قدامنا ويقول لنا:

- هو دا شيخ العرب يا اولاد.. لازم ينسحب من قرونه.. لأنه تمبل.. ياكل
ويشرب وينظ ويزبل وينام.. ما بيعملش حاجه غير كده في الحياه.. هو دا شيخ
العرب يا اولاد.. تروح مسقفين وقايلين.. هيبه.

وبعد الجوله يسألنا الخواجه:

- مبسوطين يا بنات؟ مبسوطين يا اولاد؟

ونردد كلنا ورا سيد أبو معيز:

- مبسوطين يا خواجه.. كل عام وإنت طيب والمدامه طيبه وفريد بيه طيب.

فيضحك الخواجه ويقول:

- وشيخ العرب قرونه أطول.

نروح مستقفين يروح سيد أبو معيز كانستا وهو بيقول:

- ياللا على أمك إنت وهو.. والوداع من عاش.

ونرجع زي مارحنا زي ماجينا.. وكل سنه والخواجه طيب.

نرجع بقى للخواجه كارنو صاحب الكلب الآنف ذكره.

هو كان عنده مكنة طحين ومكنة ميه وقطعة أرض زراعيه.. وبصراحه كانت

جنيئة السرايه بتاعته.. هي البريمو على جناين الخواجات.. من المأكولات خد عندك..

برتقان ويوسفندي ولارنج ولمون بنزهير وقشطه خضرا وعنب وخوخ وتين وكمشرى

ومشمش ومانجه وجوافه وبلح عامرى ومن المشمومات تمر حنه على قرنفل على

ياسمين على دقن الباشا على ورد بلدى حاجه يعنى سبحان العاطى من غير مناسبه.

وفى يوم من ذات الأيام اكتشف الخواجه إن الجنيئه بطلت تطرح.. أو زي

ماتقول.. هو اتهيأله كده.. لكن والله الوكيل احنا اللي كنا بناكلها نيّه.

عملنا فى سور الجنيئه منط سرى على شجرة المشمش الكبير «خد الجميل».

أنا فاكر إننا خدنا القرار ده بعد مناقشات طويله حول حرمانية ودناءة العمل اللي

حزرتكبه.. ناس قالوا دا خواجه والسرقه فيه حلال استناداً على دعاء خطبة الجمعة

اللى الشيخ أبو عيطه بيقوله ع المنبر وبالتحديد الفقره الخاصه بالكفار اللي بتقول:

- اللهم اجعلهم وأموالهم وأولادهم ونساءهم غنيمه المسلمين.

وناس قالوا السرقه فى حد ذاتها حرام سواء من مسلم أو كافر.. لكن الواد غريب

ابن أم تهاى حسم المناقشه بجمله زعم أنها حديث نبوى بتقول:

- ربنا ما يفرح حد واحنا حزاني.

وف ليله سودا ماطلع لهاش قمر وكان أوان المشمش.. نزلنا ثلاث عيال من المنط.
واستينا احنا فوق.. نراقب لهم الطريق ونشقط منهم.. هما يادوب رجليهم لمست
أرض الجنينه وسمعنا صريخهم وفي لمح البصر بقوا فوق تاني وأول رجليهم ما
طالت الأرض ماوقفوش.. واحنا وافقين مدهولين.

الواد الأخراني من الرعب عمل الثقيله على روحه وبقي عمال يشر وهو بيحري
ومن باب شر البليه.. ضحكنا كلنا عليه خصوصاً بعد ما غريب قال:

- الواد سيد ابن أمك سعادته مطعون سيخ في مفساه.

المهم لحقناهم نستفهم منهم.. إيه بقى الحكايه.. أتارى الخواجه ابن الحرام جاب
كلب متوحش فى الكتم وربطه فى شجره المشمش خد الجميل تحت المنط وكلفه
بحسن استقبال الضيوف.

بس ياسيدى.. رجالتنا نزلوا وجرى اللي جرى.. الواد أبو هندواى أقسم بأغلظ
الأيمان إلى إن مربوط فى شجره المشمش ده مش كلب.. ده بسم الله الرحمن الرحيم
ويبنى وبينك الواد معاه حق.. فيه كلب قد الكنبه؟ فيه كلب عنيه بتطلع شرار؟
وبعدين دا ماكانش بيهو هو زى بقية خلق الله.. دا كان بيور.. أى والله كان بيور..
كان بيور الوره والجعيص فينا هو اللي يسبق فى الهرب مع إننا كنا بنبقى متأكدين إنه
مربوط.. ولما كانوا بيطلقوه بالليل كان يقطع السكه حتى ع الدوريه.. خلاصه
الكلام.. الكلب دا كان عامل لى قلق من نوع غريب.

أنا بعون الله ماكانش فيه كلب فى البلد يستجري يقف فى سكتى.. كلب خالى
الشوادفى الرهيب أنا جعلت منه عبره فى البلد وفرجت عليه أمه لا إله إلا الله..
الأول ماكانش بينى وبينه إلا كل خير.. لأنى كنت يومياً داخل خارج فى بيت خالى
وهو كان بيعاملنى على إنى واحد من البيت وانا خارج وانا داخل يهز ديله ويتمسح
فى.. يعنى أهل.. وذات ليله أنا رايح بيت خالى أتاربه لأم جماعه صحابه وزانقين
كلبه فى الضلمه.. ودا موضوع طبعاً مايخصنيش.. وأفاجأ باللى ناطط فى كرشى

على خوانه خلاً الجلاييه الجديده عباره عن هلاهيل ! ومش كده ويس داه استمر فى الهجوم على وكأنى بينى وبينه تار بايت.

- يابن الكلب يا زباله.. وحياه أمك لأدمرك.

وقد كان.. قعدت أفكر له وأدبر له وأخيراً وجدت الحل فى سن إبره حطيتهوله فى حته لحمه شففته ورميتها له.. قعد ثلاث سنين يكح وانسقم وبقى هفيه لكل من هب ودب.. أولاً للعالم اللى ياما نظ فى كروشهم وقطع هدمهم وثانياً للكلاب اللى ياما ضربهم وكل نسوانهم وأخيراً طلعت روحه النجسه ومات فى ستين داهيه وكل البلد فرحت فيه وكل البلد كانت عارفه مين اللى قتله ماعدا خالى الشوادفى.. فى هذه الأثناء كانت زعامه العيال مقسومه بينى وبين غريب ابن أم تهاى.. فكانت عصابه غريب دايمًا يضر بولى ع الوتر الحساس:

- تقدر على كلب كارنو؟

طبعًا اعمل مش سامع:

- لو إنت أبو عزت صحيح هات لنا مشمش من جنيته كارنو.

أغير موضوع الحديث فوراً.

- طب تقدر تعدى بالليل من ورا سرايه كارنو وتيجى على دار أبو هنداوى وتاخذ بريزه.

أطنش أو أقول أنا مش محتاج فلوس من حد.

عرفت سعادتك سبب اهتمامى بكلب أهل الكهف بالذات دونًا عن الخمس أشياء اللى حيخشوا الجنة؟

وقبل ما أفكر أطلب من سيدنا يقول لنا ولوسطرين فى موضوع كلب أهل الكهف تطلع هو مشكوراً وسألنا:

- عارفين كلب أهل الكهف اسمه إيه يا خنازير ياولاد الخنازير؟

وردينا فى نفس واحد:

- لا يا سيدنا.

قال:

- اسمه قطمير يازوانى يا اولاد الزوانى.. وهو سيد كلاب الأرض.. وإذا ذكر
يا هلف يابن الهلف إنت وهو.. لازم تقولوا عليه السلام.

وفوجتنا بسيدنا عمال يتطوح شمال ويمين ويطلع رغاوى من بقه ويزعق بعزم ما
فيه:

- يا حيبى يا قطمير.. الصبحه ياسيد الكلاب.. قطمير.. قطمير.. قطمير.

وزعقنا فى نفس واحد:

- عليه السلام.

وابتسم سيدنا فى زهو ووطى على جلابية محمود عرفه اللي كان نايم مسح فيها
بقه من الرغاوى وسألنا بلهجه وديه:

- إنت عارف يا كلب يا ابن الكلب إنت وهو.. لو كلب هجم عليك فى السكه
وقلت له قطمير يعمل إيه؟

قلنا له:

- لا يا سيدنا.

ضحك وقال:

- يا عينى عليكو يا جهله.. يقف مطرحه عدل وينحنى لك باحترام لا تستحقه لا
إنت ولا أهلك وممكن يدبك ضهره تركبه.

أنا بعد كده ماسمعتش حاجه من أصله.. وأول ماخرجنا من الكتاب أصدرت
تعليماتى:

- ماحدث يروح.. لا من عصابتى ولا من عصابة غريب.

وقفوا العيال ساكتين يبصوا لي.. فقلت بكبرياء وثقه:

- أنا النهارده عازمكوع الغدا.

العيال قعدوا يبصوا لبعض مش فاهمين حاجه فكملت:

- الغدا النهارده مانجه ومن جنينة كارنو.

وصرخ واد من عصابة غريب:

- ومين اللي حيجيب المانجه من تحت؟

وردت بمنتهى الهدوء والعنجهيه:

- أنا.

وسأل واد من عصابتي:

- يالهوى.. والكلب؟

ابتسمت ابتسامه الواثق وبعدين ضحكت بألاطه وقلت ببساطه:

- ح اركبه.

وانفجرت عصابتي بالتهليل والتكبير:

- الله أكبر.. يدوم الحماس يا ابو عزت.. يدوم الحماس يا دكوم الحماس يا

بطل.

وفضلوا يصحنوا لعصابة غريب على كفوفهم ويطلعوا لهم لسانهم إلى أن تحرك

الركب الميمون في اتجاه الهدف الجليل.. اللي هو جنينة كارنو.

واحنا ماشيين ساكناش حد فينا قادر يفتح بقه بكلمه ولا حتى يبص للي جنبه..

سكون مهيب إلى أن وصلنا بسلامة الله إلى الهدف المنشود.

دلدلتنا روسنا من السور لقينا الزميل مربوط في الشجره ونايم في غفله ربه وما

عندوش فكره باللى حيجراله.. وابتسمت في سرى وقررت بمنتهى الحزم وضع حد

لأسطوره الكلب الذي لا يهزم.. كنت واثق من سلاحى لدرجة إنى قلت بصوت مسموع:

- جالك الموت يا تارك الصلا.

وبحركه استعراضيه رشيقه قفزت على حافه السور وحطيت ديلى فى سنانى.. مع ملاحظه إن الجلابيه ع اللحم.. وقلت للعيال:

- سقفه للنبي.

سقفوا.

قلت لهم:

- قولوا هيه.

قالوا:

- هيه.

قلت لهم:

- وكمان هيه.

قالوا:

- وكمان هيبه.

قلت لهم:

- سقفه شديده للنبي بقى.

سقفوا سقفه شديده.

وبحركه مظلبيه مفاجئه رح ناطط بقيت فى حضن الكلب وزعقت فى وشه بثقه:

- قظمير عليه السلام.

ودى كانت آخر جملة سمعتها.

ما اعرفش بقى فات قد إيه؟ بعدها فقت الخواجايه راميانى فى الزريبه
وبتدلق على ميه سخنه بتغلى وبتدهن لى مرهم وشكلها قرفان من هدومي اللى بقت
هلاهيل والدم اللى ييشلب من كل حته فى جسمى وبتترطن بالجريجى بشكل
مايطمنش وباضرب بعينى لقيت لك ثلاث عيال من عصابتى متكتفين فى حبل واحد
ومرميين فى ركن من أركان الزريبه وماحدش فيهم نفسه طالع من الرعب.. ريك
والحق أنا بدأت أخاف م المجهول.. وإذ بالمنقذ العجيب والدائم اللى هو صوت أمى
جأى من بره السرايه وهى بتقول جملتين لسه مش فاهمهم إلى وقتنا هذا.. كانت
بتقول: - سلامتك يا شلبى!! سلامتك يا معجبانى!!

